

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Upernaviup eqqaani nunaqarfimmi Innaarsunni oqaluffiliornissamut Naalakkersuisut AIS15-imi 10 mio. koruuninik immikkoortitseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Immanuelson, Siumut)

Tungavilersuut:

Nunaqarfik Innaarsuit ukiut 100 matuma siornatigut ilaqutariinnik Kristensen-ikunnik tungavilerneqarpoq, kingusinnerusukkullu aamma ilaqutariit allat peqataalersimallutik. Taamani pissusiusut malillugit piniarneq puisinniarneq kisimi anigaasarsiutaavoq ukiullu ingerlanerini pingaartumik nalitsinni namminersorerulernerup aallartisimalernerani inumminik eqeersimaartunik inuussutissarsiornikkut siuariartortinneqarsimavoq, upernaarlum manna april-imi ukiut 100-it Innaarsuit inoqaleqqarneranniit qaangiutissapput.

Nunaqarfik pileqqaarnerminik piniarnikkut tungaveqartumik najorneqarpoq soorluttaaq nunaqarfiit allat taamatut oqaluttuarisaanitsinni ingerlalersarsimasut, ukiullu ingerlaneranni kinguaariit piniarnermik tungaveqartumik nunaqarfisik siumukartittuarsimavaat, taamani pissusiusut malillugit allanik isumalluutissaqangikkaluarlutik ikioqatigiinnermikkut, ukiut ingerlaneranni allanittaag ilataartormikkut, inuussutissarsiornikkut sukkasuumik nunaqarfik siuariartortissimallugu.

Ulloq manna tikillugu nunatta namminersorerulernerata aallartissimalernerani inuit namminneq nunaqartut pilersitaminnik innaallagissiorfeqarnikkut tunisassiorfeqarnikkullu ikioqatigiillutik pilersitsisimapput, tamakkuuppullu malunniutit siulliit nunaqarfiup inuisa ikioqatigiillutik allanik isumalluusersorpallaaratik periarfissarititaasullu atorluarlugit takutikkiartuaarsimasaat.

Soorunami tupinnanngitsumik qinikkat qulliunerusut suleqatigalugit 1980-kkut naalerneranni nunaqarfittut ineriartortitassatut Innaarsuit aalajangiunneqarpoq, tamatumalu malitsigisaanik nunaqarfiup ineriartornera sukkasuumik ingerlasimavoq, aamma sanaartornikkut kommuunip Namminersorerullutillu Oqartussat suleqatigilluarnerisigut.

Ullumikkut nunaqarfik Innaarsuit nunaqarfinni aningaasarsiornikkut siuarsimanerpaajungikkuni siuarsimanerpaanut ilaalersimavoq, tamannalu tungavigalugu inuttussutikkut qaffakkiartuinnarluni. Inuussutissarsiornikkut periarfissagissaarnini inumminillu eqeersimartunik

maligassaasumik suleqatigiiffigineqarluarami ineriartortinneqaqqinnisaa pissusissamisoorpoq, sanaartornikkummi aamma periarfissat ikarsaariarfiusussat nunaqarfiup tikissimagamigit.

Nunaqarfik Innaarsuit 150-160 akornanni maannakkut inoqartoq suli allanik nuuffigineqarusukkaluarpoq, illussaqaarnikkulli allanisulli ajornartorsiutit atuunnerat tunngavigalugu noorfigineqanngilaq. Periarfissatullu utaqqineqartutut ippoq illoqaarnikkut annertunerusumik periarfissaqartitsisoqarnissaa, nalunngilaralu tamanna aamma nunaqarfinni aqutsisut kommunalbestyrelsellu suleqatigillutik periarfissiuunniarsarimmatigit soorlutaaq nunaqarfinnut allanut taamatut periarfissarsiuussiniartoqartoq.

Ullumikkut nunaqarfiup atuarfia ineeqqanik sisamanik initalik katilluni tamarmi 203 kvadratmeter-iuvoq. Atuarfiup sananeqaataa tamaat eqqarsaatigalugu angigisassaannngilaq. Init ilaat naalagiartarfittut atornerqarpoq, ini atuartitsiviusoq naalagiartarfittut katersuuttarfiusoq 49 kvadratmeter-isut angissuseqartoq inunnut 40-t missaannut naatsorsuussaavoq.

Nunaqarfiup inuttussusia eqqarsaatigalugu oqaluffimmik pisariaqartitsisoqavippoq, tamannalu tungavigalugu suliaq allartinneqaqqullugu Naalakkersuisut suliasamik aallartitsinissaat anguniarlugu Inatsisartuniit Naalakkersuisut peqquneqassasut Innaarsuit oqaluffittaartinneqarnissaata suliniutigalugu aallartinnissaanik siunnersuuteqarpunga.

Qaasuitsup Kommuniata borgmesteriata ajornartorsiut Naalakkersuisumut susassaqartumut oqaloqatiginnikkut saqqummiusimagaa ilisimavara, suliasaq tamakkiisumik Namminersorlutik Oqartussanit anigaasartuutigineqartussaammat. Neriutigaara naalakkersuisut suliniummik aallartitsinissaq piumassuseqarfigissagaat.

Innaarsuit oqaluffittaartinneqarnissaanik siunnersuut Inatsisartuni oqaluserilluarneqarnissaa neriutugalungu saqqummiuppara.

Siunnersuutip pisortanut aningaasaqarnikkut allaffissornikkullu kinguneqaatissai

Innaarsunni oqaluffiliorneq nunatta karsianut 10 mio. kr.-inik aningaasartuuteqarnermik kinguneqarnissaa naatsorsuutigineqarpoq. Aningaasartuutinik naliliineq taanna Alluitsup Paani oqaluffimmik nappaaqqinnermut atatillugu 2011-mi B-tut missingersuusiamik aallaaveqarpoq. Taamanikkut sanaartornissaq 7,2 mio. kr.-inik naleqassanganineqarpoq. Nunattali avannaani sanaartorneq kujataani sanaartornermit akisuneruvoq, avannaanimi piffissaq sanaartorfiusartoq sivikinneruvoq, taamattaarlu Alluitsup Paani oqaluffimmit annerusumik pisariaqartitsisoqarunarluni. Taamaammallu aningaasartuutissaq taama annertussuseqartussatut taggineqarpoq. Tassungalugu atatillugu sanaartukkat tamarmik pilersaarusiornermut atatillugu taggineqartumit 20 – 30 %-imik akisnerusarnerat erseqqissaatigineqassaaq. Taamaammallu aningaasartuutissatut missingiut sanaartukkap Nunatta Karsianut aningaasartuutaanissaanut tikuussisuuinnarpoq. Inatsisartut Naalakkersuisullu AIS15-imik suliarinninnermut atatillugu taarsiullugit ileqqaarutissanik nassaannngippata, siunnersuutip akuerineqarneratigut pisortat aningaasaqarnerat 10 mio. kr.-it missaani ajorseriaateqassaaq.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai

Soqanngilaq.